



UNIVERSITÄTS-  
BIBLIOTHEK  
PADERBORN

## **Claudii Fleurii Abbatis Historia Ecclesiastica**

Ab anno Christi 1740. usque ad annum 1742

**Fleury, Claude**

**Augustæ Vindelicorum, 1787**

**VD18 90119649**

§. 72. Breve Apostolicum Benedicti XIV. Pontificis ad Franciæ Præsules de obligatione Sacramenta publice refractariis denegandi.

---

[urn:nbn:de:hbz:466:1-67882](https://nbn-resolving.org/urn:nbn:de:hbz:466:1-67882)

contra præfatum Beaumont Parisien- Sæc. XVIII.  
sem Archiepiscopum condemnavit; A. C. 1742.  
quinimo jam anno hujus sæculi quadra-  
gesimo octavo præclaram hanc Sedi A-  
postolicæ ac Benedicto XIV. Pontifici  
confessionem edidit tam illustri sane Se-  
nato dignissimam: *Ecclesia Gallicana om-  
ni tempore demonstravit, quod inviolabi-  
liter adhæreat Cathedræ S. Petri, cen-  
tro unitatis, illique Ecclesiæ, in qua tra-  
ditio Apostolica perpetuo est conservata.  
Veneratur in Persona Papæ Vicarium  
Christi & Caput visibile Universalis Ec-  
clesiæ: quæ veneratio novum accipit incre-  
mentum a virtute & profunda sapientia  
Pontificis, qui hodie adeo digne replet Se-  
dem Apostolicam.*

## §. LXXII.

*Breve Apostolicum Benedicti XIV. de  
obligatione Sacramenta refracta-  
riis denegandi.*

Postquam igitur triginta illi tres Fran-  
ciæ Episcopi a Clero Gallicano Ro-  
mam deputati Benedictum XIV. Papam  
de toto controversiæ statu certiozem fe-  
cerant, & porrectis etiam Regis Chri-  
stianissimi literis supplicibus de Galli-  
canæ Ecclesiæ doctrina circa notam  
Constitutionem sincere rationem reddi-  
derant, Pontifex rem cum Theologo-  
rum præcipuis, totoque Cardinalium  
*Hist. Eccles. Tom. LXXVII. Y y cœ-*

Sæc. XVIII. coetu mature discussit, & tandem pro  
 A. C. 1742. sua nunquam satis admiranda perspica-  
 cia ac eruditione totam hanc contro-  
 versiam exhaustisse videbatur; sublatis-  
 que omnibus difficultatibus planam, tri-  
 tamque viam premens die decima sexta  
 Octobris anno 1756. ad omnes Franciæ  
 Cardinales, Archiepiscopos, Episcopos  
 in novissimis Cleri Gallicani comitiis  
 congregatos transmisit Breve Apostoli-  
 cum, quod in qualibet Historia dignif-  
 simum sibi vendicat locum. Illud ita  
 incipit :

„Ex omnibus Christiani orbis regio-  
 „nibus, ad quas imposita imbecillitati  
 „nostræ pastoralis cura protenditur, cum  
 „multa sæpe ad nos deferantur, quæ  
 „animum nostrum pro omnium, singu-  
 „larumque Ecclesiarum statu sollicitum  
 „& anxium habent; vix tamen aliunde  
 „nobis majores perturbationis atque  
 „doloris causæ acciderunt, quam ex  
 „gravissimis controversiarum ac dissen-  
 „sionum incommodis, quibus floren-  
 „tissimum istud regnum & Catholicam  
 „Gallorum nationem aliquot abhinc an-  
 „nis jactari cognovimus. Neque sane  
 „destitimus hoc toto perturbationum  
 „vestrarum tempore Deum optimum  
 „Maximum enixe rogare, ac interposi-  
 „tis etiam aliorum precibus orare atque  
 „ob-

„obsecrare, ut ipse, qui Deus pacis est, Sæc. XVIII.  
 „veram solidamque tranquillitatem tur- A. C. 1742.  
 „batis Ecclesiis vestris reddere digna-  
 „retur. Sæpe etiam, datis ad charif-  
 „simum in Christo filium nostrum Ludo-  
 „vicum Galliarum Regem Christianissi-  
 „mum apostolicis litteris, illius opem  
 „& brachium ad Ecclesiasticæ pacis tu-  
 „telam atque præsidium imploravimus.  
 „lis autem, qui ad nos & ad Sedem  
 „Apostolicam de rebus istis recursum  
 „habuerunt, ea semper responsa dedi-  
 „mus, quibus nos promptos paratosque  
 „declaravimus, pro pace Ecclesiæ Gal-  
 „licanæ, quam sincera & constanti di-  
 „lectione prosequimur, quidquid nobis  
 „vitæ superesse posset, libenter impen-  
 „dere, atque omnia, quæ nobis agenda  
 „proponuntur, & aggredi & urgere;  
 „dummodo ejusmodi consilia essent, quæ  
 „ad evellendum malorum germen apta  
 „& idonea dignoscerentur, & quorum  
 „executio cum spe prosperi eventus su-  
 „scipienda & ad intentum finem utiliter  
 „processura videretur.

„Gravem atque diuturnam de re-  
 „bus vestris sollicitudinem, qua hacte-  
 „nus affecti fuimus, non parum suble-  
 „varunt litteræ e Cleri Gallicani comi-  
 „tiis die 31. Octobris elapsi anni ad nos  
 „scriptæ; quas quidem legentes, per-  
 „spe-

Sæc. XVII. „speximus vestram, venerabiles Fra-  
 A. C. 1742. „tres, firmitatem atque constantiam &  
 „perfectam consensionem in custodiendo  
 „veræ sanæque doctrinæ deposito, & in  
 „retinenda, quam semper majores ve-  
 „stri professi sunt, erga Apostolicam  
 „Beati Petri Sedem, Catholicæ unita-  
 „tis centrum, observantia & venera-  
 „tione. Neque enim ullam inter vos  
 „dissensionem vigere comperimus quoad  
 „canonicas regulas & principia, sed  
 „scissuras tantummodo esse inter vos in  
 „deligendis statuendisque mediis, qui-  
 „bus utendum necessario est, ut eadem  
 „communia principia in usum deducan-  
 „tur. Quod quamvis optandum fuisset  
 „longe abesse a Conventu vestro, haud  
 „tamen mire videri debet scientibus id  
 „alias inter sacros Antistites & doctrina  
 „& morum sanctitate conspicuos, in gra-  
 „vissimarum rerum tractatione evenisse.  
 „In magnam autem præconceptæ con-  
 „solationis nostræ accessionem sese obtu-  
 „lit eximia Christianissimi Regis pietas  
 „& religio, cum hæreditario ipsius in  
 „hanc Apostolicam Sedem obsequio con-  
 „iuncta, quæ non in recentioribus tan-  
 „tummodo illius litteris, quas die 19.  
 „Decembris elapsi anni, prædictam Cle-  
 „ri Epistolam huc mittens, ad nos de-  
 „dit, sed in cæteris quoque omnibus ab  
 „eo conscriptis præclare enituit, in qui-  
 „bus

„bus testari possumus atque debemus, **Sæc. XVIII.**  
 „nos semper illius regil animi sensus **A. C. 1742.**  
 „eos planeprehendisse, qui maxime  
 „decebant Orthodoxum Principem, &  
 „vera in Deum Religione & sincera er-  
 „ga Romanam Sedem pietate prædi-  
 „tum, eundemque pacis atque concor-  
 „diæ in suis regnis restituendæ & con-  
 „servandæ amantissimum.

„Tanta est profecto in Ecclesia Dei  
 „authoritas Apostolicæ Constitutionis,  
 „quæ incipit: *Unigenitus*, eademque sibi  
 „tam sinceram venerationem, obse-  
 „quium & obedientiam ubique vindi-  
 „cat, ut nemo fidelium possit absque  
 „salutis æternæ discrimine a debita er-  
 „ga ipsam subjectione sese subducere,  
 „aut eidem ullo modo refragari. Hinc  
 „porro consequitur, ut in ea, quæ ex-  
 „orta est, controversia, utrum hujus-  
 „modi refractariis Sanctissimum Corpo-  
 „ris Christi Viaticum expetentibus de-  
 „negari debeat, sine ulla hæsitacione  
 „respondendum sit, quoties prædictæ  
 „Constitutioni publice & notorie refra-  
 „ctarii sunt, denegandum eis esse ex ge-  
 „nerali nimirum regula, quæ vetat pu-  
 „blicum atque notorium peccatorem ad  
 „Euchristicæ communionis participa-  
 „tionem admitti, sive eam publice, sive  
 „privatim requirat.

Y y 3

„Pu-

Sæc. XVIII.

A. C. 1742.

„Publici autem atque notorii sunt  
 „refractarii, in casu de quo agitur, qui-  
 „cunque per sententiam a Judice com-  
 „petente prolatam rei declarati sunt  
 „eo nomine, quod debitam prædictæ  
 „Constitutioni *Unigenitus* venerationem,  
 „obsequium & obedientiam contuma-  
 „citer denegaverint; quicumque etiam  
 „hujusmodi contumaciæ reos se in ju-  
 „dicio confessi sunt; ac præterea illi,  
 „qui quamvis nec a Judice condemnati,  
 „neque reatum suum in judicio confessi  
 „fuerint, nihilominus vel eo tempore,  
 „quo sacrum ipsum Viaticum suscepturi  
 „sunt, propriam inobedientiam & con-  
 „tumaciam adversus Constitutionem  
 „*Unigenitus* sponte profitentur; vel in  
 „anteactæ vitæ decursu aliquid eviden-  
 „ter commississe noscuntur manifeste op-  
 „positum venerationi, obsequio & obe-  
 „dientiæ eidem Constitutioni debitæ,  
 „in eoque facto moraliter perseverare;  
 „quod ita vulgo cognitum est, ut publi-  
 „cum scandalum inde exortum non ad-  
 „huc cessaverit. In his enim casibus  
 „eadem omnino adest moralis certitu-  
 „do, quæ habetur de iis factis, super  
 „quibus Judex sententiam tulit; vel sal-  
 „tem alia suppetit moralis certitudo præ-  
 „dictæ similis & æquipollens.

„In quo tamen præ oculis haben-  
 „da est differentia, quæ intercedit in-  
 ter

„ter notorium illud, quo merum ali- Sæc. XVIII.  
 „quod factum deprehenditur, cujus fa- A. C. 1742.  
 „cti reatus in ipsa sola externa actione  
 „consistit, ut est notorietas usurarii  
 „aut concubinari; & aliud notorii  
 „genus, quo externa illa facta notari  
 „contingit, quorum reatus ab interna  
 „etiam animi dispositione plurimum  
 „pendet: de quo quidem notorii genere  
 „nunc agitur. Alterum enim illud gra-  
 „vibus sane probationibus evinci debet;  
 „sed alterum gravioribus certioribus-  
 „que argumentis probari oportebit.

„Ea vero, quam supra innuimus,  
 „certitudo minime adesse dicenda est in  
 „aliis casibus, in quibus crimen nititur  
 „conjecturis, præsumptionibus incer-  
 „tisque vocibus, quæ originem suam  
 „plerumque debent aut hominibus aut  
 „malo animo affectis, aut qui præjudi-  
 „catis opinionibus vel partium studiis  
 „ducuntur; quibus dum fides habetur,  
 „satis compertum est, tum præterito-  
 „rum temporum, tum ætatis nostræ ex-  
 „perientia, quot modis homines errare  
 „& falli ac in transversum agi contingat.

„Quia vero nonnulli animarum Pa-  
 „stores Ecclesiæque Ministri pietate &  
 „zelo commendati hujusmodi conjectu-  
 „ris deferentes, dum ad sacrum Via-  
 „ticum ministrandum advocantur, ani-

Sæc. XVIII. „mo anxii hærent, verentes ne id sine  
 A. C. 1742 „propriæ conscientiæ periculo admini-  
 „strare non possint, certam subnectimus  
 „agendi regulam, quam sequantur.

„Hoc itaque primum animadver-  
 „tere debent, an scilicet ei, qui extre-  
 „mum Viaticum postulat, cum antea  
 „ad sacram mensam accederet, pa-  
 „schali præsertim tempore, a loci illius  
 „Parocho Eucharistica communio ad-  
 „ministrata fuerit: si enim hæc illi in  
 „vita non fuerit denegata, argumento  
 „id erit, aut hominem illum ab omni  
 „labe immunem, aut saltem non vere  
 „notorium peccatorem reputatum fuisse;  
 „se; indeque sequetur, sacrum Viati-  
 „cum eidem in exitu vitæ publice po-  
 „stulanti denegari non posse, nisi forte,  
 „postquam olim ad Eucharisticam mes-  
 „sam admissus fuit, & ante id tempus,  
 „quo postrema Sacramenta requirit, ali-  
 „quid commisisse noscatur, quo publici  
 „& notorii peccatoris notam, juxta præ-  
 „missa, contraxerit.

„Ubi autem ex facti specie certum  
 „ipsis non suppetat fundamentum, cui  
 „insistere valeant, aliunde vero validæ  
 „adversus ægrotum præsumptiones &  
 „indicia gravia & urgentia militent, ob  
 „quæ abortum sibi scrupulum rationa-  
 „biliter deponere nequeant, in his re-  
 „rum

„tum circumstantiis oportet eos remo- Sæc. XVIII.  
 „tis arbitris, ægrotantem alloqui, ei- A. C. 1742.  
 „que cum animi lenitate & mansuetu-  
 „dine, non tanquam disputantes, eum-  
 „que convincere volentes, ostendere,  
 „quæ & qualia sint indicia, quæ suspe-  
 „ctum reddunt ipsius vitæ tenorem, ro-  
 „gantes eum & obsecrantes, ut resipi-  
 „scat, in eo saltem temporis articulo,  
 „a quo æterna ipsius salutis fors pendet;  
 „eidemque præterea demonstrantes,  
 „quod, quamvis ipsi parati sint, san-  
 „ctissimum Corporis Christi Viaticum ei  
 „ministrare, ac etiam reipsa illud ei mi-  
 „nistrent, non ideo tamen tutus ipse  
 „erit ante Tribunal Christi; sed potius  
 „novi & horrendi criminis se reum con-  
 „stituet, ex quo iudicium sibi mandu-  
 „cabit & bibit. Cæterum se non alia  
 „de causa Sacramentum corporis Chri-  
 „sti eidem ministraturos, nisi ut Eccle-  
 „siæ jubenti obtemperent, quæ præter  
 „eam, quam habet, curam, ut scandala  
 „publica antevertat, pro sua etiam pie-  
 „tate ægroti ipsius infamiam præcavere  
 „studet, & idcirco eum a sacra mensa  
 „non repellit, dum ipsum, licet pecca-  
 „rem in conspectu Domini reputet, non  
 „tamen in proprio tribunali publicum  
 „atque notorium peccatorem agnoscit.  
 „Hanc itaque iudicandi agendique  
 „normam oportet vos, Venerabiles fra-  
 „tres,

Sæc. XVIII.  
A. C. 1742.

„tres, utpote nostro & Apostolicæ Se-  
„dis iudicio probatam, inferioribus a-  
„nimarum Pastoribus cæterisque Pres-  
„byteris per civitates & Diæceses ve-  
„stras Sacramenta legitime administran-  
„tibus sequendam & observandam pro-  
„ponere. Quod quidem iudicium su-  
„per vigentibus controversiis a nobis  
„interpositum & Ecclesiasticis regulis  
„nititur & Conciliorum olim in ipsis  
„Galliarum regionibus habitorum de-  
„cretis, & gravium ipsius nationis ve-  
„stræ Theologorum sententiis fulcitur.  
„Ut igitur vobis laudi fuit, illustrium  
„prædecessorum vestrorum exempla se-  
„quendo, promotas isthic controversias  
„subortaque dubia ad nos & Apostoli-  
„cam Sedem deferre, certamque hinc  
„regulam ad revocandam tuendamque  
„Ecclesiarum vestrarum pacem expo-  
„scere, ita nunc officii vestri partes ve-  
„straque simul apud Deum & Ecclesiam  
„merita cumulabitis, si supra scriptam  
„agendi methodum ab iis, ad quos per-  
„tinet, in occurrentibus casibus omni-  
„no servari curabitis. Quod nos a Fra-  
„tternitatibus vestris eo fidentius exspe-  
„ctamus, nobisque pollicemur, quo ma-  
„gis nobis ipsi conscius sumus, nihil dili-  
„gentiæ aut studii a nobis prætermis-  
„sum fuisse, sive in perpendendis ac di-  
„scutiendis articulis, quos Episcopi in  
„præ-

„præfatis Cleri comitiis adunati, licet Sæc. XVIII.  
 „non unanimi sententia, proposuerunt, A. C. 1742.  
 „desumendisque ex ipsa eorum discre-  
 „pantia notionibus ad rem penitus per-  
 „cipiendam rectoque iudicio definien-  
 „dam opportunis, sive in legendis pon-  
 „derandisque sententiis scripto exara-  
 „tis a Venerabilibus Fratribus nostris  
 „hujus Sacr. Eccles. Rom. Cardinali-  
 „bus, quorum hac de re consilia exqui-  
 „sivimus, sive in cæteris omnibus exe-  
 „quendis atque præstandis, per quæ  
 „Divini luminis adjutorium, quod in-  
 „terim flagrantissimis votis implorare  
 „non prætermisimus, nobis promereri  
 „possimus.

„Neque vero dubitamus, quin Cha-  
 „rissimus quoque in Christo Filius no-  
 „ster Rex Christianissimus, postquam  
 „susceptum a vobis consilium non so-  
 „lum probavit, sed etiam, ut supra in-  
 „nuimus, suis ad nos datis litteris fo-  
 „vere & adjuvare non recusavit, pro  
 „sua perspecta in Deum & Ecclesiam re-  
 „ligione ac pietate, validam Fraterni-  
 „tatibus vestris opem præbere studeat,  
 „quo tam vobis quam inferioribus Ec-  
 „clesiæ ministris liberum & integrum  
 „sit, ad superius descriptam agendi nor-  
 „mam sacrorum Mysteriorum admini-  
 „strationem moderari. Qua fiducia fre-  
 „ti

Sæc. XVIII. „ti nos hic sermonem minime haben-  
 A. C. 1742. „dum existimavimus de reliquis Fra-  
 „trum vestrorum articulis respicienti-  
 „bus Episcopalia jura circa eorundem  
 „Sacramentorum participationem con-  
 „cedendam vel denegandam, & varias  
 „super hac re obortas controversias; sed  
 „potius cum ipso Christianissimo Rege  
 „per alias litteras nostras agendum du-  
 „ximus, ut is sacra Episcopatus jura  
 „sua animi magnitudine ac præstanti  
 „virtute tueatur. Quod ipsum & pro-  
 „prio & majorum suorum more factu-  
 „rum certo confidimus; ut nobilissimæ  
 „Galliarum Ecclesiæ illius regio favore  
 „nostris vestrisque studiis obsecundante,  
 „suum pristinum decorem retinuisse, &  
 „& perturbatam ad tempus tranquilli-  
 „tatem cito recuperasse lætentur.

„In cujus optatissimi eventus auspi-  
 „cium, Fraternitatibus vestris cunctis-  
 „que populis pastorali curæ vestræ con-  
 „credit, Apostolicam Benedictionem  
 „peramanter impertimur.“

Hoc Pontificis Breve Ludovicus  
 Franciæ Rex non modo tanquam veri-  
 tatis Palladium miris encomiis celebra-  
 vit, sed & illud in acta Parlamenti re-  
 ferri, die decima tertia Decembris jus-  
 sit, uti mox narrabimus.